

Mazarin
4010

Les Veritez de Mazarin

**RARE BOOK
COLLECTION**



**THE LIBRARY OF THE
UNIVERSITY OF
NORTH CAROLINA
AT
CHAPEL HILL
MAZARIN
4010**

UNIVERSITY OF N.C. AT CHAPEL HILL



00023014907

N^o 24

V4010

7

LES

VERITEZ

DE

MAZARIN

DESCOVVERTES.

A PARIS,

M. DC. XLIX.

LES VERITEZ DE MAZARIN DESCOVERTES.

AMY Lecteur, tout ainsi qu'en l'ancien Testament nous lisons qu'un Isaac, Jacob & autres ont esté la figure de Iesus-Christ, à cause de leur grande innocence & leur eminente sainteté; de même, ie croy avec raison que l'Ante-Christ qui est opposé en tout à Iesus-Christ, doit estre figuré avant qu'il paroisse sur la terre par quelque mauvais garniement, & quelque personne abominable, qui nous représente sa malice qui doit estre dans le dernier degré. Or parce que iusques à present dans la suite de tous les siècles passez, nous ne voyons point qu'aucune personne aye esté remplie d'une assez grande meschanceté pour nous le figurer; c'est pourquoy nous ne pouvons pas asseurer que la representation & le modèle de ce scelerat aye paru dans aucun des siècles qui se sont escoulez. Ce signe fatal estoit reserué pour nous, & cette Commette, presage du plus grand mal de tous les maux, devoit paroistre dessus nos testes pour escarter tous nos plaisirs, & ne nous faire esperer à l'aduenir que de sinistres & funestes euene-ments. Que si enfin, amy Lecteur, tu m'obliges à te dire qui est celuy-là, de quelle contrée, si c'est un homme, un diable, ou quelque monstre espouuantable: Pour te mettre hors de peine ie te répondray en un mot que c'est Mazarin, cet infame; que c'est un Sicilien; que c'est un homme en apparence, mais un demon & un diable en effet. Je te diray que c'est veritablement un monstre, puis qu'il est composé de parties qui n'ont aucun rapport les unes avec les autres; puis qu'il est un amas & un assemblage de tous les vices, & puis qu'il est contre le dessein & l'intention de la nature. C'est celuy-là même qui est la figure de l'Ante-christ; tu croiras

que ce que ie te dis sont impostures, mais prends garde à ce qui s'enfuit, & sans douter tu en tomberas d'accord avec moy. On dit de l'Ante-christ, qu'il doit r'enfermer en soy tous les defauts & toutes les iniquitez de tous ceux qui l'auront precedé; qu'il doit troubler tous les Estats du monde, & apporter de la confusion par tout; qu'il doit abolir les Loix, tous les Statuts, & étouffer la Religion. Et qui plus est, qu'il doit faire condescendre la plus grande partie des hommes à le suiure, par ses menaces & rigueurs. D'où vient que l'Escripture mesme s'en estonnant, dit que bien-heureux seront ceux-là qui ne seront pas pour lors sur la terre, & qui ne verront pas tous ces desordres. Cela estant veritable de l'Ante-christ, & vn article de Foy, où trouuerons-nous sa figure, puisque ces siecles passez n'ont pas esté assez mal-heureux que de l'auoir produite; peut-estre que la fin du monde s'approchant, Dieu permettra qu'elle paroistra pour espouuenter les hommes, pour les faire r'entrer en eux-mesmes, & pour les aduertir de faire leur salut. Mais non, cela n'est pas; la Sicile l'a engendré, & quelque vent d'Aquilon, nonobstant tous les flots qui vouloient & qui deuoient l'engloutir, l'a fait aborder à nostre France, où elle a desia monstre ce qu'elle est, & ce que ie t'ay proposé: Tu m'entends assez, il n'est pas besoin de m'expliquer, puisque tu es tesmoin oculaire de ses degats, & que tu as resenty toy-mesme les effets de sa tyrannie. Je ne veux pas nommer personne, c'est Mazarin, c'est cet eminent Cardinal tout empourpré de nostre sang, si ce n'est que ie vueille dire que cette esscarlatte marque desia les feux d'Enfer où il doit estre bien-tost precipité. C'est luy que ie soustiens estre la figure de l'Ante-christ, ie le iustifie. Car s'il est vray que l'Ante-christ doit estre vn abbrege de tous les vices, & de toutes les iniquitez, ie puis dire que Iules est l'iniquité mesme. Auparuant qu'il fust arriué en France, on viuoit à la Cour avec toute franchise, avec honneur, & on ne s'estoit iamais laissé emporter aux excez du ieu, & de toutes les autres desbauches; la pudicité des Dames y auoit esté obseruée, & iamais aucun Seigneur n'y auoit trouué son mal-heur: il n'y a que depuis qu'il y est arriué que tout ce bel ordre a esté renuersé; C'est luy qui a fait que tout le monde y a esté suspect; C'est luy-mesme qui y a introduit les excez; C'est luy qui est cause que les meilleures & les plus ancien-

nes familles du Royaume s'y sont ruinées ; C'est luy qui a fourbé tant de Seigneurs, qui n'ayants pas encore descouverts ses fraudes, procedoient avec luy en gens d'honneur, comme c'est le propre des François : Et non seulement il a infecté la Cour de son venin, mais encore tout le reste de la France ; Car de grace, qui est celuy qui auoit iamais entendu parler qu'en France les enleuements fussent permis, que les viols, les vols, & les massacres y fussent autorisez, sinon depuis que ce perfide à commencé à la regir, personne asseurement. Deplus, l'Ante-christ doit ietter la terreur & l'estonnement dans les cœurs de tout le monde ; il doit ruiner tous les Estats, & les réunir a son autorité ; il doit se faire adorer, & mettre bas la Religion : Mais qu'est-ce qu'à voulu faire ce Mazarin, sinon de faire en sorte qu'on le reuerast comme vne Diuinité, sinon qu'on luy donnast de l'encens, preferant son interest à celuy-là de Dieu mesme ? n'a-il pas troublé ce noble Estar, ne vouloit-il pas le gouverner absolument, ne s'est-il pas moqué de nostre Religion, en mes-vsant des Benefices, & les employant pour entretenir ses desbauches ? Si le temps me le permettoit, & si ie ne craignois de t'estre importun, amy Lecteur, ie te descrirois amplement son humeur, mais ie crois que tu es assez persuadé qu'il est la figure de l'Ante-christ. Au reste, j'ay composé ce petit discours pour que tu loues Dieu de ce qu'il est hors de Paris, & le prie qu'il luy plaise l'enuoyer hors de France ; de peur qu'ayant commencé à la corrompre, il ne la ruine tout à fait.

FIN.

